



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka (“Službeni glasnik BiH” broj 95/12), člana 25. Pravilnika o godišnjim finansijskim izvještajima političkih stranaka (“Službeni glasnik BiH” broj 96/13), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH”, broj: 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2013. GODINU LIBERALNO DEMOKRATSKE STRANKE BOSNE I HERCEGOVINE

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije.....	5
Cilj revizije.....	5
Obim revizije.....	5
4. PRETHODNE KONTROLE I REVIZIJE	5
5. NALAZI I PREPORUKE	6
5.1. NALAZI.....	6
5.2. PREPORUKE.....	10

MIŠLJENJE REVIZORA

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Liberalno demokratske stranke Bosne i Hercegovine za 2013. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom godišnjeg finansijskog izvještaja za 2013. godinu, utvrđeno je da je Liberalno demokratska stranka Bosne i Hercegovine prekršila odredbe člana 4. stav (1), člana 5. stav (4), člana 11. i člana 12. stav (1), (3) i (4) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Narodna demokratska stranka u 2013. godini postupala u skladu sa odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Liberalno demokratske stranke Bosne i Hercegovine za 2013. godinu.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Liberalno demokratska stranka Bosne i Hercegovine se finansirala iz sljedećih izvora:

Red. br.	Vrsta prihoda	Iznos u KM	Učešće u uk. prih. %
1	Članarina	48,00	0,08%
2	Prilozi fizičkih lica (3-a)	200,00	0,35%
3	Prilozi pravnih lica (3-b)	200,00	0,35%
4	Prihodi od imovine (3-c)	0,00	0,00%
5	Prihodi od pr.lica (3-d)	0,00	0,00%
6	Prihodi od poklona (3-e)	0,00	0,00%
7	Prihodi iz budžeta (3-f)	57.444,98	99,22%
8	Prihodi od propag. (3-g)	0,00	0,00%
9	Ostali prihodi	0,00	0,00%
I	Ukupni prihodi	57.892,98	100,00%
II	Kreditno zaduženje kod banaka	0,00	0,00%
Izvori finansiranja (I+II)		57.892,98	100,00%

Prema podacima iz godišnjeg finansijskog izvještaja, Liberalno demokratska stranka Bosne i Hercegovine ostvarila je rashode u ukupnom iznosu od 41.806,08 KM.

2. PREDSTAVLJANJE POLITIČKE STRANKE

Naziv političke stranke je Liberalno demokratska stranka BiH. Skraćeni naziv stranke je LDS BiH.

Liberalno demokratska stranka Bosne i Hercegovine upisana je u registar političkih organizacija kod Kantonalnog suda u Sarajevu, rješenjem broj: R-1-2/00 od 03.07.2000. godine, sa sjedištem u Sarajevu, Maršala Tita 9A.

Prema podacima iz godišnjeg finansijskog izvještaja, lice ovlašteno za zastupanje stranke je Amir Husarić, predsjednik stranke.

Prema podacima iz godišnjeg finansijskog izvještaja, lice ovlašteno za finansijske izvještaje za 2013. godinu je Edin Šehić.

Prema podacima iz godišnjeg finansijskog izvještaja za 2013. godinu, Liberalno demokratska stranka ima sljedeću oragnizacionu strukturu:

- Centralni ured LDS BiH u Sarajevu,
- Mladi liberali BiH,
- Kantonalni odbor LDS BiH Goražde i
- 18 općinskih odbora LDS BiH.

3. OPIS REVIZIJE

Predmet revizije je godišnji finansijski izvještaj Liberalno demokratske stranke Bosne i Hercegovine za 2013. godinu, i to sljedećih organizacionih dijelova političke stranke:

- Centralni ured LDS BiH u Sarajevu,
- Kantonalni odbora LDS BiH Goražde i
- Općinski odbor LDS BiH Jablanica.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Liberalno demokratska stranka Bosne i Hercegovine u izvještajnom periodu postupala u skladu sa odredbama Zakona o finansiranju političkih stranaka.

Obim revizije finansijskih izvještaja Liberalno demokratske stranke Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju je izvršila pregled i reviziju godišnjih finansijskih izvještaja Liberalno demokratske stranke BiH u periodu od 2005. do 2012. godine, nakon kojih su izdati izvještaji o reviziji, odnosno izvještaj o pregledu sa mišljenjem revizora, nalazima i preporukama revizije. Služba za reviziju izvršila je pregled godišnjeg finansijskog izvještaja Liberalno demokratske stranke BiH za 2012. godinu, nakon kojeg je izdat izvještaj o pregledu sa mišljenjem revizora i preporukama stranci da se ne finansira iz izvora koji su političkim strankama zabranjeni, da vodi evidencije o svojim prihodima i rashodima i da finansijske izvještaje podnosi Centralnoj izbornoj komisiji BiH u formi propisanoj Pravilnikom o godišnjim finansijskim izvještajima političkih stranaka i da poštuje i druge propise, prevashodno porezne, iz kojih proističu dodatne obaveze i troškovi, koje politička stranka treba izmirivati i evidentirati u poslovnim knjigama i finansijskom izvještaju koji podnosi Centralnoj izbornoj komisiji BiH.

Nerealizovane preporuke:

Na osnovu uočenih nedostataka u godišnjem finansijskom izvještaju za 2013. godinu, utvrđeno je da Liberalno demokratska stranka BiH nije ispoštovala date preporuke.

5. NALAZI I PREPORUKE

5.1. NALAZI

a) Liberalno demokratska stranka BiH prekršila je odredbe člana 4. stav (1) Zakona o finansiranju političkih stranaka.¹

Politička stranka je, u skladu sa odlukom Kantonalnog odbora LDS BiH Goražde, broj: 03-03-4/13 od 28.01.2013. godine nabavila putničko vozilo marke SUZUKI XL7, po cijeni od 19.500,00 KM, koje u poslovnim knjigama nije evidentirano kao stalno sredstvo stranke.

Na osnovu revizije poslovnih knjiga i dostupne finansijske dokumentacije ovog organizacionog dijela stranke, utvrđeno je dodatno ulaganje na vozilu za ugradnju plina, u iznosu od 1.430,00 KM, nabavka goriva u iznosu od 3.774,60 KM i plina u iznosu od 102,95 KM.

Isplata sredstva za kupovinu vozila, koje nije uknjiženo u vlasništvo stranke, kao i isplata za troškove goriva, a posebno ako se ima u vidu činjenica da se Kantonalni odbor LDS BiH Goražde finansira isključivo iz budžeta, suprotna je odredbi člana 4. stav (1) Zakona o finansiranju političkih stranaka.

b) Liberalno demokratska stranka BiH prekršila je odredbu člana 5. stav (4) Zakona o finansiranju političkih stranaka.²

Liberalno demokratska stranka BiH je korištenjem poslovnih prostora u vlasništvu općina bez plaćanja zakupnine, ostvarila nenovčanu donaciju, koju je u skladu sa Pravilnikom o godišnjim finansijskim izvještajima političkih stranaka i Zakonom o finansiranju političkih stranaka imala obavezu da evidentira u poslovnim knjigama i prijavi u godišnjem finansijskom izvještaju za 2013. godinu.

- Uvidom u Odluku o dodijeli na korištenje poslovnih prostorija bez naknade,³ utvrđeno je da je Općinski odbor LDS BiH Jablanica koristio poslovni prostor Općine Jablanica površine 25,20m², bez plaćanja zakupnine.
- Općinski odbor stranke u Ilijašu je na osnovu Odluke o načinu i visini plaćanja zakupnine⁴, koristio poslovni prostor površine 16,53m², također bez naknade.

c) Liberalno demokratska stranka BiH prekršila je odredbu člana 11. i člana 12. stav (1), (3) i (4) Zakona o finansiranju političkih stranaka.

Na osnovu obavljene revizije, utvrđeno je da je Liberalno demokratska stranka BiH nije vodila poslovne knjige u skladu sa računovodstvenim propisima, nije uspostavila potpune i tačne evidencije o svojim prihodima i rashodima, prometu novčanih sredstva putem transakcijskog računa i blagajne, finansijski izvještaj nije podnijela u formi koju je propisala Centralna izborna komisija BiH i na zahtjev Centralne izborne komisije BiH nije dostavljala traženu dokumentaciju.

¹ Finansijska sredstva iz člana 3. stav (1) Zakona o finansiranju političkih stranaka, stranka može koristiti isključivo za ostvarivanje ciljeva utvrđenih svojim programom i statutom.

² Političke partije dužne su da vode evidenciju o prijemu članarina i dobrovoljnih priloga, te da izdaju potvrde o prijemu članarina i dobrovoljnih priloga. Ovlašćeno lice u političkoj partiji uplaćuje članarinu i dobrovoljne priloge neposredno na transakcijski račun političke partije najkasnije u roku od 10 dana od dana prijema uplate.

³ Odluka Općinskog vijeća Općine Jablanica broj. 02-02-535-3/13-VI od 28.03.2013. godine.

⁴ Akt Općine Ilijaš broj: 04/1-14-sl/14 NM od 01.04.2014.godine sa prilogom Odlukom broj: 01-I-02-190/00 od 17.02.2000. godine.

(1) Stranka u poslovnim knjigama nije pravilno evidentirala prihode iz budžeta i nije pravilno popunila finansijski izvještaj, odnosno obrasce 3-f (prihodi iz budžeta) i 3 (ukupni prihodi političke stranke), čime je prekršila odredbe člana 19. i člana 13. Pravilnika o godišnjim finansijskim izvještajima političkih stranaka.

- U poslovnim knjigama i finansijskom izvještaju koji je podnijela Centralnoj izbornoj komisiji Bosne i Hercegovine, politička stranka nije iskazala prihode iz budžeta općine Donji Vakuf u iznosu od 4.017,87 KM.

Na Zahtjev Centralne izborne komisije Bosne i Hercegovine Općina Donji Vakuf je dostavila akt broj: 06-14-01922/14-2 od 15.10.2014.godine, sa pregledom uplaćenih sredstva u periodu od 01.01. do 31.12.2013. godine u ukupnom iznosu od 4.017,87 KM. Navedena sredstva Općina Donji Vakuf uplatila je na transakcioni račun broj: 1011330000346989 kod Privredne banke Sarajevo PJ Donji Vakuf. Stranka navedena sredstva, koja je ostvarila iz budžeta nije evidentirala u poslovnim knjigama, niti je iskazala u godišnjem finansijskom izvještaju.

- Liberalno demokratska stranka BiH je u finansijskom izvještaju, na obrascu 3-f (prihodi iz budžeta) za Centralni ured stranke, iskazala prihod iz budžeta u iznosu od 7.062,00 KM. Kontrolom izvoda sa transakcijskog računa kod Sparkasse banke, broj: 1990490005093420 utvrđeno je da su to sredstva uplaćena općinskim odborima iz budžeta sljedećih općina: Gračanica u iznosu od 1.395,04 KM, Ilijaš u iznosu od 1.928,61 KM, Jablanica u iznosu od 1.574,78 KM, Doboj-Istok 224,00 KM i Općine Travnik u iznosu od 2.089,00 KM, što ukupno iznosi 7.211,43 KM.
- U poslovnim knjigama stranka je kao prihod iz budžeta u iznosu od 4.177,00 KM evidentirala interne prenose sredstava od strane nižih organizacionih dijelova stranke i članarinu u iznosu od 48,00 KM.
Kontrolom izvoda sa transakcijskog računa Centralnog ureda stranke, otvorenog kod Sparkasse banke, utvrđeni su interni prenosi sredstava od strane organizacionih dijelova stranke i to: OO LDS BiH Srebrenik u iznosu od 730,00 KM, OO LDS BiH Donji Vakuf u iznosu od 952,00 KM, OO LDS BiH Tešanj u iznosu od 495,00 KM i Kantonalnog odbora LDS BiH Goražde u iznosu od 2.000,00 KM

(2) Politička stranka u poslovnim knjigama nije uspostavila tačne i pravovremene evidencije o rashodima i u finansijskom izvještaju, u obrascima 4 (ukupni rashodi političke stranke) i 4.1 (režijsko-administrativni i ostali troškovi) nije pravilno iskazala podatke o rashodima, čime je prekršila odredbe člana 21. i člana 22. Pravilnika.

- Evidencije o troškovima Kantonalnog odbora stranke u Goraždu, uspostavljene su samo do 17.05.2013. godine, i to na osnovu računa koji su plaćeni dobavljačima. Suprotno računovodstvenim propisima i odredbi člana 12. stav (1) Zakona o finansiranju političkih stranaka, stranka troškove ne evidentira u momentu kada joj je pružena usluga, ili izvršena nabavka. Usluge koje nisu plaćene, stranka ne evidentira niti na troškovima, niti na obavezama. Na osnovu izvoda po transakcionom računu Moje banke koje je stranka dostavila nakon izdatog preliminarog izvještaja, utvrđeno je da troškovi Kantonalnog odbora stranke Goražde iznose 18.290,12 KM, a ne 16.275,31 KM kao što je stranka evidentirala u poslovnim knjigama i iskazala u finansijskom izvještaju.
- Politička stranka je, u skladu sa odlukom KO LDS BiH Goražde, broj: 03-03-4/13 od 28.01.2013. godine nabavila putničko vozilo marke SUZUKI XL7, po cijeni od 19.500,00 KM.

Vozilo je kupljeno od stranačkog funkcionera.⁵ Formirana je tročlana komisija o kupovini vozila, koja je u februaru 2013. godine izvršila pregled vozila, konstatovala stanje vozila i predložila predsjedniku KO LDS Goražde da sa prodavcem zaključi kupoprodajni ugovor. Uvidom u ugovor koji je potpisao prodavac-funkcioner LDS BiH sa predsjednikom KO LDS BiH Goražde utvrđeno je da je isti potpisan 30.01.2012. godine, iako je procedura nabavke provedena u periodu januar-februar 2013. godine.

Pomenuto vozilo nije evidentirano u poslovnim knjigama, kao stalno sredstvo u vlasništvu političke stranke. U knjigovodstvenim evidencijama, koje su dostupne revizorima, evidentirana je isplata dijela nabavne cijene vozila, u iznosu od 6.500,00 KM. Iako vozilo nije uknjiženo u poslovne knjige stranke, KO LDS BiH je po osnovu njega imao troškove goriva u iznosu od 3.774,60 KM. Na vozilu su na teret političke stranke izvršena ulaganja u iznosu od 1.430,00 KM, odnosno ugradnja plina. Stranka je nabavila i plin u vrijednosti od 102,95 KM.

Osim navedenih troškova, ovaj organizacioni dio stranke je imao i trošak u iznosu od 220,73 KM za tekuće održavanje vozila Škode Octavie, koja nije evidentirana u poslovnim knjigama stranke.

- Stranka je iskazala zakupninu za KO LDS BiH Goražde u iznosu od 600,00 KM koju je platila za tri mjeseca, april, maj i juni 2013. godine. Obzirom da nije stranka nije predočila ugovore o zakupu, nije utvrđen stvarni trošak zakupnine. Troškove električne energije stranka je iskazala u iznosu od 520,96 KM, troškove reprezentacije u iznosu od 2.597,14 KM, i troškove telefona u iznosu od 792,38 KM, i to samo po računima koje je platila, pa nije moguće utvrditi stvarne troškove.

Politička stranka je pored računa za njene telefonske usluge, platila dva računa u iznosu od 466,83 KM za stranačke funkcionere. Obzirom da te osobe nisu uposlenici stranke, isplate za njihove obaveze imaju karakter ličnih primanja koja su oporeziva.

- Općinski odbor LDS BIH Jablanica je na osnovu Odluke o dodijeli na korištenje poslovnih prostorija bez naknade, koristio poslovni prostor površine 25,20m². Na osnovu navedenog, utvrđeno je da troškove zakupa za poslovni prostor koji je koristio Općinski odbor LDS BIH Jablanica nije iskazan u finansijskom izvještaju i poslovnim knjigama.
- Općinski odbor LDS BIH Ilijaš je na osnovu Odluke o načinu i visini plaćanja zakupnine, koristio poslovni prostor površine 16,53m² bez naknade. Na osnovu navedenog, utvrđeno je da troškove zakupa za poslovni prostor koji je koristio Općinski odbor LDS BIH Ilijaš nije iskazan u finansijskom izvještaju i poslovnim knjigama.
- Općinski odbor LDS BiH Donji Vakuf je na osnovu Ugovora o zakupu sa Općinom Donji Vakuf⁶, koristio poslovni prostor površine 12,2 m² uz dogovorenu cijenu mjesečnog zakupa od 61,00 KM. Za šest mjeseci troškovi zakupa poslovnog prostora iznose 366,00 KM, koje stranka nije iskazala u finansijskom izvještaju.

(3) LDS BiH u finansijskom izvještaju, u obrascu 2 (pregled prometa svih transakcijskih računa političke stranke) godišnjeg finansijskog izvještaja nije iskazala tačne podatke o prometu ostvarenom putem transakcijskih računa Centralnog ureda stranke, Kantonalnog odbora LDS BiH Goražde i Općinskog odbora LDS BiH Donji Vakuf, čime je prekršila odredbe člana 11. Pravilnika.

- Kontrolom izvoda sa transakcijskog računa Centralnog ureda stranke u Sarajevu, utvrđeno je da podaci o prometu ulaza i izlaza, koji su iskazani u obrascu 2 finansijskog izvještaja, ne

⁵ Funkcioner LDS BiH Rasim Mujagić

⁶ Ugovor sklopljen dana 19.06.2013. godine sa Općinom Donji Vakuf, uz mjesečnu cijenu za prostor površine 12,2 m² od 61,00 KM.

odgovaraju izvodima sa transakcijskog računa ovog organizacionog dijela. Prema izvodima sa transakcionog računa broj: 1990490005093420 kod Sparkasse banke, promet ulaza iznosio je 14.748,70 KM, a promet izlaza 16.805,02 KM. Stranka je u obrascu 2 iskazala promet ulaza u iznosu od 10.970,89 KM i promet izlaza u iznosu od 13.027,24 KM.

- Stranka je na obrascu 2 (pregled prometa svih transakcijskih računa) za Kantonalni odbor stranke Goražde iskazala sljedeće podatke: početno stanje na dan 01.01.2013.god. 8.307,65 KM, promet ulaza 18.707,53 KM, promet izlaza 25.422,83 KM i stanje na dan 31.12.2013. godine 1.592,35 KM. Nakon izdatog Preliminarnog izvještaja stranka je dostavila karticu prometa po izvodima Moje banke⁷ za 2013. godinu, u kojoj su utvrđeni sljedeći podaci i to: početno stanje na dan 01.01.2013. godine 8.307,65 KM, promet ulaza 20.028,53 KM, promet izlaza 27.760,21 KM, i stanje na dan 31.12.2013. godine 575,97 KM. Podaci iskazani u finansijskom izvještaju za promet ulaza, promet izlaza kao i stanje na dan 31.12.2013. godine, ne odgovaraju podacima evidentiranim u kartici prometa izvoda Moje banke za Kantonalni odbor stranke Goražde.
 - Kod OO LDS BiH Donji Vakuf stranka nije iskazala promet transakcijskog računa. Prema podacima Općine Donji Vakuf, iz akta broj: 06-14-011922/14-2 od 15.10.2014. godine, stranci su uplaćena sredstava iz budžeta ove Općine u iznosu od 4.017,87 KM, na transakcioni račun broj: 1011330000346989 Prviredna banka PJ Donji Vakuf.
- (4) LDS BiH nije u obrascu 2-1 (pregled stanja blagajne) iskazala tačne podatke o prometu ostvarenom putem blagajne za Centralni ured stranke u Sarajevu i Kantonalni odbor stranke u Goraždu, čime je prekršila odredbe člana 12. Pravilnika.
- U obrascu 2-1 godišnjeg finansijskog izvještaja stranka je iskazala sljedeće podatke o prometu ostvarenom putem blagajne Centralnog ureda LDS BiH: početno stanje na dan 01.01.2013. godine u iznosu od 261,15 KM, promet ulaza u iznosu od 5.425,00 KM, promet izlaza u iznosu od 3.000,00 KM i stanje na dan 31.12.2013. godine u iznosu od 2.686,15 KM. Stranka je u poslovnim knjigama iskazala početno stanje blagajne na dan 01.01.2013. godine u iznosu od 261,15 KM, promet ulaza u iznosu od 6.395,00 KM, promet izlaza u iznosu od 4.925,07 KM i stanje na dan 31.12.2013. godine u iznosu od 1.731,08 KM. Prema blagajničkim evidencijama Centralnog ureda LDS BiH (naloga za naplatu i isplatu sredstva i dnevnika blagajne), na dan 01.01.2013. godine na blagajni nije bilo sredstava, dok je tokom godine ostvaren promet u iznosu od 6.768,37 KM, pa na dan 31. 12. 2013. godine stanje blagajne je nula.
 - Promet blagajne Kantonalnog odbora stranke u Goražde, revizijom nije potvrđen. Stranka nije omogućila uvid u kompletnu blagajničku dokumentaciju. Podaci o prometu blagajne iskazani u poslovnim knjigama KO LDS BiH Goražde, znatno se razlikuju od prometa iskazanog u finansijskom izvještaju. U finansijskom izvještaju na obrascu 2-1 (pregled stanja blagajne) iskazani su sljedeći podaci: za početno stanje 374,70 KM, promet ulaza 3000,00 KM, promet izlaza 1.949,84 KM i stanje na dan 31.12.2013. godine 1.424,86 KM. Prema podacima iz poslovnih knjiga, ovaj organizacioni dio stranke nije imao nikakvih sredstava 01.01.2013.godine, priliv na blagajnu je ostvaren u iznosu od 3.000,00 KM, odliv sredstva, odnosno gotovinske isplate iz blagajne izvršene su u iznosu od 2.988,26 KM, pa je stanje gotovine na blagajni 31.12.2013. godine evidentirano u iznosu od 11,74 KM. Podaci iskazani u finasijskom izvještaju za početno stanje blagajne na dan 01.01.2013. godine, promet izlaza kao i stanja na dan 31.12.2013. godine, ne odgovaraju podacima evidentiranim u poslovnim knjigama.
 - Uvidom u dostupnu blagajničku evidenciju Kantonalnog odbora LDS BiH Goražde, utvrđeno je da je izvršena isplata sredstava u iznosu od 400,00 KM i to za 8 fizičkih lica u pojedinačnim

⁷ Analitička kartica prometa izvoda Moje banke za 2013.godinu, dostavljeni dana 03.07.2015.godine.

iznosima od 50,00 KM, koji nisu uposlenici stranke. Isplate su, također, izvršene na osnovu neispravne i nepotpune blagajničke dokumentacije. Na naložima za isplatu, koji su potpisani od strane osoba koje su primile sredstva, nije naveden iznos koji politička stranka isplaćuje. Isplaćena sredstva imaju karakter ličnih primanja i oporeziva su u skladu sa poreznim propisima. Za troškove KO LDS BiH Goražde nastale u periodu od 08.11.2012. do 25.01.2013. godine isplaćena su sredstva u iznosu od 213,25 KM na osnovu spiska troškova, bez računa i prapratne blagajničke dokumentacije.

U blagajničkom dnevniku 17.05.2013. godine je evidentirana isplata sredstava fizičkom licu u iznosu od 1.000,00 KM sa naznakom „novac predat za materijalne troškove i kancelarijske obaveze“. Obzirom da stranka nema evidencije o utrošku pomenutih sredstava, niti ima potraživanja od lica kome su sredstva isplaćena, ista imaju karakter ličnih primanja i oporeziva su u skladu sa poreznim propisima.

- Kontrolom blagajničke dokumentacije Općinskog odbora LDS BiH Jablanica utvrđeno je da su tokom godine isplaćivane naknade za rad u stranci za dva fizička lica u ukupnom iznosu od 950,00 KM, isplate na ime izleta Mladih liberala u iznosu od 570,00 KM, kao i isplate za prevoz fizičkih lica u iznosu od 275,00 KM, odnosno izvršene su isplate u ukupnom iznosu od 1.795,00 KM. Obzirom da su isplate izvršene licima koja nisu uposlenici stranke, iste imaju karakter ličnih primanja, na koja je stranka trebala obračunati i uplatiti porez na dohodak i doprinose u skladu sa poreznim propisima.

Obzirom da LDS BiH nije obračunala porez na dohodak i doprinose na isplaćena sredstva, troškovi i obaveze po ovom osnovu nisu iskazani u poslovnim knjigama i godišnjem finansijskom izvještaju.

5.2. PREPORUKE

Preporučuje se Liberalno demokratskoj stranci Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da finansijska sredstva koristi isključivo za ostvarivanje ciljeva utvrđenih u programu i statutu stranke,*
- *da vodi evidencije o prijemu dobrovoljnih priloga-nenovčanih donacija,*
- *da vodi poslovne knjige u skladu sa zakonom,*
- *da vodi tačne evidencije o svojim prihodima i rashodima,*
- *da finansijske izvještaje podnosi u formi koju je odobrila Centralna izborna komisija Bosne i Hercegovine, odnosno da prihode i rashode iskazuje na način propisan Pravilnikom o godišnjim finansijskim izvještajima političkih stranaka,*
- *da na zahtjev Centralne izborne komisije dostavlja finansijsku dokumentaciju i druge izvještaje u skladu sa članom 12. stav (4) Zakona, te revizorima Službe za reviziju obezbijedi pristup dokumentaciji neophodnoj za vršenje revizije finansiranja političke stranke i*
- *da poštuje i druge propise, prevashodno poreske, iz kojih proističu dodatne obaveze i troškovi.*

KOMENTAR

U ostavljenom roku, Liberalno demokratska stranka Bosne i Hercegovine nije se očitovala na nalaze revizije i mišljenje revizora dato u Preliminarnom izvještaju o reviziji godišnjeg

finansijskog izvještaja za 2013. godinu. Stranka je samo dostavila analitičku karticu prometa po izvodima Moje banke za Kantonalni odbor LDS BiH Goražde za 2013. godinu.

Revizor

Nevenko Andan

Šef Službe za reviziju, revizor

mr.sc. Hasida Gušić